

NE'MA YÛH'ENNAYE PÊŞIN

Pêşgotin

Nivîsk'ar xwexa navê xwe ne'mêda nade, lê li gora wan şe'dêd sedsa-lîyêd pêşinda xudanê vê ne'mê Yûh'enna^f ye, awa gotî xût ew Yûh'enna ye, yê ku «Mizgînîya li gora Yûh'enna» nivîsiye. Yûh'enna vê ne'mêda ser du merema sekinîye:

1. Dil dide ber xwendevana, ku yektîya Xwedê û Kur'ê Wî Îsa Mesîh-da bijîn.

2. Xwendevan miqatî xwe bin, ku pey hînkirinêd şaş neçin, k'ijan yektîya t'ev Xwedê xirab dikin.

Li gora dîtina wan dersdarêd şaş, her tiştêd ku vê dinêda berç'e'va ne, ew xirab in, t'enê tiştêd r'uh'anî qenc in û tiştêd fizîkî û r'uh'anî nikarin bigihîjine hev ku bibin yek. Lema jî vana bi vê fikira xwe nikaribû bawer bikira, ku Îsayê Kur'ê^f Xwedê bi xûn û goşt hatîye vê dinê, usa jî ew nikaribû bimira. Serda jî wan dersdara hîn dikir, ku hingê meriv^f digihîje xilazbûnê^f, gava t'ewqê xwe ji dinê diqetîne. Wana bawer dikir, ku yêd r'uh'anî dikarin her cûr'e bënâmûsî û k'êfêd xweş derbaz kin, çimkî heleqetîya r'uh' t'evî qalib t'une û r'uh' nah'er'ime. Sed-salîya yekê h'eta sisîyada ev hînkirina «ginostîkîyê» dihate belakirinê.

Şandî^f zelal dibêje ku Mesîh r'ast bû merî. Ewê ku vê yekê qebûl nake, wekî Îsa Mesîh bedena însênda hate dinê, ew ji R'uh'ê Xwedê xeber nade, lê ew ji ek'sîmesîh e (4:3). Zar'êd Xwedêye r'ast hindava hevda r'astîyê û h'izkirinêda dimînin, lê «yê ku h'iz nake ew Xwedê nas nake, çimkî Xwedê h'izkirin e» (4:8).

Serecema fikira ne'mê

Pêşgotin (1:1-4)

R'onayî û te'rî (1:5-2:29)

Zar'êd Xwedê û zar'êd mîrêcin^f (3:1-24)

R'astî û ner'astî (4:1-6)

Borcê h'izkirinê (4:7-21)

Bawerîya serk'etî (5:1-21)

Xebera jîyînê

1 ¹ Em ser wê yekê wer'a dibêjin, çi ku serê sêrîda hebû, me ew yek bihîst, bi ç'e'vê xwe dît, li Wî nihêr'î û dest dane Wî: Ew Xebera jîyînê ye*. ² Jîyîn e'yan bû, me ew dît, em şe'detîyê didin û bona wê jîyîna^f h'eta-h'etayê wer'a dibêjin, ya ku cem Bavê^f bû û meva e'yan bû*. ³ Ew tiştê ku me dît û bihîst em wer'a jî dibêjin, wekî hûn jî meva t'evgirêdayî bin û ev t'evgirêdana me jî t'evî Bav û Kur'ê Wî Îsa Mesîh e. ⁴ Em van tiştê wer'a dinivîsin, wekî şabûna me* t'emam be.

Xwedê r'onayî ye: Em nava r'onayîya Wîda her'in

⁵ Ev e ew gotina ku me ji Wî bihîst û e'lamî we dikin, ku Xwedê r'onayî ye û t'u te'rî Wîda t'une. ⁶ Heger em bêjin: «Em Xwedêva t'evgirêdayî ne», lê te'rîyêda biger'in, em

derewa dikin û r'astîyê nakin. ⁷ Lê heger em r'onayêda biger'in, çawa ku Ew r'onayêda ye, emê hevva t'evgirêdayî bin û xûna Îsayê Kur'ê Wî wê me ji h'emû guna^f paqîj ke. ⁸ Heger em bêjin: «Gunê^f me t'une», em xwexa xwe dixapînin û r'astî nava meda t'une. ⁹ Lê heger em gunêd xwe bidine r'ûyê xwe, Ew xweyê sozê Xwe ye û heqîyê dike, wê gunêd me bibaxşîne û me ji h'emû neheqîya paqîj ke. ¹⁰ Heger em bêjin: «Me gune nekirîye», em Wî derewîn derdixin û xebera Wî nava meda t'une.

Îsa Mesîh piştgirê me ye

2 ¹ Zar'okêd min, ez vê yekê wer'a dinivîsim, wekî hûn guna nekin, lê heger yek gune bike, li cem Bavê piştgirê me, Îsa Mesîh, Yê Heq heye. ² Ew e mecala baxşandina gunêd me û ne ku t'enê gunêd me, lê gunêd t'emamîya dinyayê jî.

* ^{1:1} Yûh'enna 1:1.

* ^{1:2} Yûh'enna 1:14.

* ^{1:4} Nav hinek destnivîsarada dewsa «me» «we» heye.

³Bi wê yekê em zanin ku em Wî nas dikin, heger em t'emîyêd Wî xwey kin. ⁴Yê ku dibêje: «Ez Wî nas dikim», lê t'emîyêd Wî naqedîne, ew derewîn e û r'astî nava wîda t'uneye. ⁵Lê yê ku gotina Wî diqedîne, h'izkirina Xwedê r'ast nava wîda t'emam e. Bi vê yekê em zanin ku em nava Wîda ne: ⁶Ewê ku dibêje: «Ez nava Wîda me», gerekê usa bijî, çawa Îsa jît.

T'emîya nû

⁷Delalno, ne ku t'emîke nû ez wer'a dinivîsim, lê wê t'emîya kevine ku hûn berê pêşda zanin. T'emîya kevin ew xeber e, ya ku we pêşda bihîstîye*. ⁸Lê belê t'emîke nû ez wer'a dinivîsim, ku r'astîya wê yekê çawa nava Wîda xuya dibe, usa jî nava weda. Çimkî te'rî derbaz dibe û r'onaya r'ast îdî r'onayê dide.

⁹Ewê ku dibêje: «Ez nava r'onayêda me», lê birê wî ber ç'e'va r'eş e, ew hela hê nava te'rîyêda ye. ¹⁰Ewê ku birê xwe h'iz dike, nava r'onayêda dimîne û nabe sebeb, ku hinek ji r'ê bik'evin*. ¹¹Lê ewê, ku birê wî ber ç'e'va r'eş e, ew nava te'rîyêda ye, nava

te'rîyêda diger'e û nizane k'uda diçe, çimkî te'rîyê ç'e'vêd wî kor kirine.

¹² Ez wer'a dinivîsim, zar'okno, çimkî bi saya navê Wî gunêd we afû^f bûne.

¹³ Ez wer'a dinivîsim, bavno, çimkî hûn Wî nas dikin, Yê ku berê pêşda heye.

Ez wer'a dinivîsim, cahilno, çimkî hûn ser yê Xirab k'etin.

¹⁴ Ez wer'a dinivîsim xişimno, çimkî hûn Bavê nas dikin.

Ez wer'a dinivîsim, bavno, çimkî hûn Wî nas dikin, Yê ku berê pêşda hebû.

Ez wer'a dinivîsim, cahilno, çimkî hûn qewat in û xebera Xwedê nava weda dimîne

û ser yê Xirab k'etine.

Dinyayê h'iz nekin

¹⁵Dinyayê h'iz nekin, ne jî wan tiştêd ku dinyayêda ne. Heger yek dinyayê h'iz dike, h'izkirina Bavê nava wîda t'une. ¹⁶Çimkî her tiştêd ku dinyayêda ne, dilhavijî, ç'e'vhavijî û k'ubar-babaxîya vî e'mirî ye, ew ne ji Bavê ne, lê ji vê dinyayê ne. ¹⁷Dinyayê jî derbaz

* ^{2:7} Yûh'enna 13:34.

* ^{2:10} Aha jî tê fe'mkirinê: «Û nabe sebeb, ku ew ji r'ê bik'eve».

be, havijîya wê jî, lê ewê ku e'mirê Xwedê diqedîne wê h'eta-h'etayê bimîne.

**H'evza xwe
ji ek'sîmesîha bikin**

¹⁸ Zar'no, va wextê axirîyê ye. Û çawa we bihîstîye ku ek'sîmesîh wê bê, îdî gelek ek'sîmesîh hatine. Ji wê yekê jî em zanin ku wextê axirîyê ye. ¹⁹ Hinek ji nava me derk'etin, lê ew ne ji me bûn. Heger ew ji me bûna, wê t'evî me bimana. Lê ew ji nava me derk'etin, ku e'yan be, ew h'emû ne ji me bûn.

²⁰ Lê we ji Mesîhê^f Pîroz^f R'uh' p'êşk'êş^f standîye* û hûn h'emû** jî r'astîyê zanin. ²¹ Ez wer'a naniwîsim, çawa ku hûn r'astîyê nizanin, lê çawa ku hûn wê yekê zanin, usa jî zanin ku her derew ne ji r'astîyê ye. ²² K'î ye derewîn? Hema ew e, yê ku dibêje: «Îsa ne Mesîh e». Ew e ek'sîmesîh, yê ku Bav û Kur' înk'ar^f dike. ²³ Ewê ku Kur' înk'ar dike, heleqetîya wî t'evî Bavê t'une. Lê yê ku Kur' îqrar^f dike, heleqetîya wî t'evî Bavê heye.

²⁴ Awa çi ku we pêşda bihîstîye, bira ew nava weda bimîne. Heger ew tiştê we pêşda bihîstîye nava weda bimîne, hûnê jî nava Kur' û Bavêda bimînin. ²⁵ Û ev e ew sozê ku Wî da me, ew jîyîna h'eta-h'etayê ye.

²⁶ Ez vî tiştî derheqa wanda wer'a dinivîsim, yêd ku dixwazin we bixapînin. ²⁷ Lê çi derheqa weda ye, ew R'uh'ê* ku we ji Mesîh standîye, nava weda dimîne. Îdî ne h'ewce ye, ku yek we hîn ke, çimkî R'uh' bona her tiştî we hîn dike û çi ku hîn dike r'ast e, ne derew e. Çawa Ewî hûn hînkirin, nav Mesîhda usa bimînin.

Zar'êd Xwedê

²⁸ Belê zar'okno, nava Wîda bimînin, wekî çaxê Ew e'yan be, em ji hatina Wî venek'işin, li ber Wî şermî nemînin. ²⁹ Heger hûn zanin ku Ew r'ast e, usa jî zanibin her kesê ku r'astîyê dike, ew ji Wî bûye.

3 ¹ Binihêr'in, Bavê em çawa h'iz kirin, wekî em zar'êd Xwedê bêne gotinê û r'ast jî em ew in.

* ^{2:20} Bi yûnanî xeber bi xeber aha ye: «Lê hûn ji Ewî Pîroz hatine r'ûnkirinê^f».

** ^{2:20} Nav hinek destnivîsarada aha ye: «Hûn her tiştî (h'emûya) zanin».

* ^{2:27} Bi yûnanî xeber bi xeber aha ye: «R'ûnkirin».

Lema dinya me nas nake, çimkî ew jî nas nekir*. ² Delalno, niha em zar'êd Xwedê ne û hela hê ne e'yan e emê bibine çî. Lê em vê yekê zanin ku çaxê Îsa e'yan be, emê bibine mîna Wî, çimkî emê Wî usa bibînin, çawa heye. ³ Her kesê ku bona vê yekê gumana xwe danîye ser Wî, ew xwe usa paqij dike, çawa ku Mesîh paqij e.

⁴ Her kesê ku gune dike, ew Qanûna Xwedê dit'er'ibîne û gune^f xût qanûnt'er'ibandin e. ⁵ Û hûn zanin ku Mesîh bona wê yekê e'yan bû, wekî guna hilde û nava Wîda gune t'une*. ⁶ Her kesê ku nava Wîda dimîne, ew nava gunada namîne, lê her kesê ku nava gunada dimîne, ewî ne Ew dîtîye, ne jî nas kirîye.

⁷ Zar'okno, bira t'u kes we nexapîne. Yê ku r'astîyê dike, ew yekî r'ast e, çawa Îsa r'ast e. ⁸ Yê nava gunada dimîne, ew ji mîrêcin e, çimkî mîrêcin ji berê pêşda gune dike. Bona vê yekê Kur'ê Xwedê e'yan bû, wekî kirêd mîrêcin xirab ke. ⁹ Her kesê ku ji Xwedê bûye, nava gunada namîne, çimkî binya-

t'a Xwedê nava wîda dimîne û ew nikare nava gunada bimîne, çimkî ji Xwedê bûye. ¹⁰ Zar'êd Xwedê û zar'êd mîrêcin bi vê yekê ji hev têne firqîkirinê: Ewê ku r'astîyê nake, ew ne ji Xwedê ye û usa jî ewê ku birê xwe h'iz nake.

Hevdu h'izkirin û r'ûspîtîya li ber Xwedê

¹¹ Ev e ew gotin, ya ku we berê pêşda bihîstîye: Gerekê em hevdu h'iz bikin*. ¹² Mîna Qayîn^f nîbin, ku ji yê Xirab bû û birê xwe kuşt. Û bona çî ew kuşt? Çimkî kirêd wî xirab bûn, lê yêd birê wî qenc*.

¹³ E'cêbmayî nemînin gelî xûşk-bira, heger hûn ber ç'e've dinyayê r'eş bin. ¹⁴ Em zanin ku em ji mirinê derbazî jîyînê bûne, çimkî em xûşk-birayêd xwe h'iz dikin. Ewê ku h'iz nake, ew nava mirinêda dimîne. ¹⁵ Her kesê ku birê wî ber ç'e'va r'eş e, ew mêrkuj e û hûn zanin ku nava t'u mêrkujîda jîyîna h'eta-h'etayê t'une. ¹⁶ Em bi vê yekê h'izkirinê h'esîyan: Îsa jîyîna Xwe bona me da. Em jî gerekê jîyîna xwe bona

* ^{3:1} Yûh'enna 1:12.

* ^{3:5} Yûh'enna 1:29.

* ^{3:11} Yûh'enna 13:34.

* ^{3:12} Destpêbûn 4.

xûşk-birayêd xwe bidin. ¹⁷ Lê heger hebûka^f yekî vê dinê hebe û birê xwe h'ewcê tiştêkî dibîne, dilê wî ser naşewite, h'izkirina Xwedê çawa dikare dilê wîda bimîne? ¹⁸ Zar'okno, ne ku em bi xeber yan zarê xwe h'iz bikin, lê bi kira û r'astîyê.

¹⁹ Bi vê yekê emê zanibin ku em ji r'astîyê ne û bikaribin bi dilekî r'ih'et ber Xwedê bisekinin. ²⁰ Lê heger dilê me dîsa me neheq ke, Xwedê ji dilê me mestir e û her tiştî zane. ²¹ Delalno, heger dilê me me neheq neke, em dikarin r'ûsipî ber Xwedê bisekinin. ²² Û çî ku bixwazin, emê ji Wî bistînin, çimkî em t'emîyêd Wî diqedînin û ew tiştêd ku li Wî xweş tên, em wan dikin. ²³ Û ev e t'emîya Wî, ku em bawerîya^f xwe navê Kur'ê Wî Îsa Mesîh bînin û em hevdu h'iz bikin, çawa ku Ewî t'emî li me kir*. ²⁴ Û ewê ku t'emîyêd Wî xwey dike, nava Xwedêda dimîne û Xwedê jî nava wîda. Û em ji vê yekê zanin ku Ew nava meda dimîne, bi wî R'uh'ê ku Ewî daye me.

R'uh'ê r'ast û r'uh'ê derew

4 ¹ Delalno, bawerîya xwe her r'uh'î neynin, lê wan r'uh'a

bicêr'ibînin^f, gelo ew ji Xwedê ne? Çimkî gelek p'êxemberêd derew derk'etine dinê. ² Hûn bi vê yekê dikarin R'uh'ê Xwedê nas bikin: Her r'uh'ê ku Îsa Mesîh bi xûn û goşt hatî îqrar dike, ew ji Xwedê ye. ³ Lê her r'uh'ê ku Îsa bi xûn û goşt hatî îqrar nake, ew ne ji Xwedê ye. Ev ji ek'sîmesîh e, bona k'îjanî we bihîstibû ku wê bê û îdî ew li dinyayêda ye.

⁴ Hûn ji Xwedê ne, zar'okno û hûn ser p'êxemberêd derew k'etine, çimkî Ew R'uh'ê nava weda ji wî r'uh'ê ku nava dinyayêda ye mestir e. ⁵ Ew ji dinyayê ne, lema ew ji dinyayê xeber didin û dinya guhdarîya wan dike. ⁶ Em ji Xwedê ne. Yê ku Xwedê nas dike, ew guhdarîya me dike. Yê ku ne ji Xwedê ye, ew guhdarîya me nake. Bi vê yekê em R'uh'ê r'astîyê û r'uh'ê ner'astîyê ji hev derdixin.

Xwedê h'izkirin e

⁷ Delalno, de em hevdu h'iz bikin, çimkî h'izkirin ji Xwedê ye û her kesê ku h'iz dike ew ji Xwedê bûye û Xwedê nas dike. ⁸ Yê ku h'iz nake ew Xwedê nas nake, çimkî Xwedê h'izkirin e. ⁹ Bi vê yekê h'izkirina Xwedê hindava meda

* ^{3:23} Yûh'enna 13:34; 15:12, 17.

xuya bû, gava ku Ewî Kur'ê Xweyî Tayê T'enê şande dinyayê, wekî em bi Wî bijîn. ¹⁰ H'izkirin ev e, ne ku me Xwedê h'iz kir, lê Ewî em h'iz kirin û Kur'ê Xwe şand çawa mecala baxşandina gunêd me. ¹¹ Delalno, heger Xwedê aha em h'iz kirin, wekî usa ye gerekê em jî hevdu h'iz bikin. ¹² T'u kesî Xwedê t'u cara ne dîtîye. Heger em hevdu h'iz dikin, Xwedê nava meda dimîne û h'izkirina Wî dilê meda gihîştîye*.

¹³ Bi vê yekê em zanin ku em nava Wîda dimînin û Ew jî nava meda, çimkî Ewî ji wî R'uh'ê Xwe daye me. ¹⁴ Me dît û em şe'detîyê didin, ku Bavê Kur'ê Xwe şand, wekî bibe Xilazkirêf dinyayê. ¹⁵ Heger yek îqrar dike ku Îsa Kur'ê Xwedê ye, Xwedê nava wîda dimîne û ew jî nava Xwedêda. ¹⁶ Awa em wê h'izkirina Xwedêye hindava xweda nas dikin û bawer dikin.

Xwedê h'izkirin e û yê ku nava h'izkirinêda dimîne, ew nava Xwedêda dimîne û Xwedê jî nava wîda. ¹⁷ H'izkirin aha dilê meda gihîştîye, wekî R'oja^f Axretê em

r'ûsipî bin, çimkî Mesîh vê dinyayêda çawa derbaz kir, usa jî em derbaz dikin*. ¹⁸ H'izkirinêda tirs t'une, lê h'izkirina gihîştî tirsê dûr dixê, çimkî tirs xweyîcefa ye û ewê ku ditirse, ew h'izkirinêda hê negihîştîye.

¹⁹ Em h'iz dikin, çimkî Ewî pêşda em h'izkirin. ²⁰ Heger yek bêje: «Ez Xwedê h'iz dikim», lê birê wî ber ç'e'va r'eş e, ew derewa dike. Heger ewê birê xwe ku dibîne h'iz nake, ew nikare Xwedê h'iz bike ku nabîne. ²¹ Û Ewî ev t'emî daye me: Ewê ku Xwedê h'iz dike, ew gerekê birê xwe jî h'iz bike.

Bi bawerîya ser Îsa Mesîh em dinyayê bindest dikin

5 ¹ Her kesê ku bawer dike, Îsa, Mesîh e, ew ji Xwedê bûye û her kesê ku Bavê h'iz dike, ew zar'a Wî jî h'iz dike. ² Bi vê yekê em zanin ku em zar'êd Xwedê h'iz dikin, gava em Xwedê h'iz dikin û t'emîyêd Wî diqedînin. ³ Çimkî bi vê yekê em h'izkirina xwe hindava Xwedêda didine k'îfşê, gava em t'emîyêd Wî xwey

* 4:12 Yûh'enna 1:18.

* 4:17 Aha jî tê fe'mkirinê: «Çimkî heleqetîya Mesîh çawa t'evî Bavê Wî heye, usa jî ya me».

dikin. Û t'emîyêd Wî ne giran in*, ⁴çimkî her kesê ku ji Xwedê bûye, dinyayê bindest dike. Û bi vî awayî em dinyayê bindest dikin, awa gotî bi bawerîya xwe. ⁵Û ew k'î ye, yê dinyayê bindest dike, pêştirî ewê ku bawer dike, ku Îsa Kur'ê Xwedê ye.

Şe'detîya bona Îsa Mesîh

⁶Eva ye, yê ku bi xûn û avê hat, Îsa Mesîh*, ne ku t'enê bi avê, lê bi xûn û avê. Û R'uh' e, yê ku şe'detîyê dide, çimkî R'uh' r'astî ye. ⁷Çimkî ev hersêk in, ku şe'detîyê didin: ⁸R'uh', av û xûn. Û şe'detîya van hersêka yek e*. ⁹Heger em şe'detîya meriva^f qebûl dikin, şe'detîya Xwedê hê zêde ye, çimkî eva şe'detîya Xwedê ye, ku bona Kur'ê Xwe şe'detî da. ¹⁰Yê ku bawerîya xwe Kur'ê Xwedê tîne, nava wîda ev şe'detî heye. Yê ku bawerîya xwe Xwedê

nayne, ew Xwedê derew derdixe, çimkî bawerîya xwe wê şe'detîyê nayne, ya ku Xwedê bona Kur'ê Xwe şe'detî da. ¹¹Û ev e şe'detî, ku Xwedê jîyîna h'eta-h'etayê da me û ev jîyîn nava Kur'ê Wîda ye*. ¹²Kur' dilê k'êda ye, jîyîna wî heye, lê Kur'ê Xwedê dilê k'êda t'une, jîyîna wî t'une.

Jîyîna h'eta-h'etayê

¹³Ez van tişta wer'a dinivîsim, yêd ku bawerîya xwe navê Kur'ê Xwedê tînin, wekî hûn bizanibin jîyîna weye h'eta-h'etayê heye. ¹⁴Em li ber Xwedê r'ûsipî ne, çimkî em zanin, heger em tiştekî li gora xwestina Wî jê bixwazin, Ew dengê me dibihê. ¹⁵Û heger em zanin ku ew her tiştêd ku em jê dixwazin dibihê, usa jî em zanin çî ku em jê dixwazin, emê bistînin.

¹⁶Heger yek bibîne ku birê wî gunek kirîye, lê nabe berbi

* ^{5:3} Yûh'enna 14:15.

* ^{5:6} Gelek vê r'êzê aha fe'm dikin: «Eva ye, Yê ku bi xûna mirina Xwe û ava nixumandina Xwe, Xwe da e'yankirinê çawa Mesîh». Li gora hînkirina ginostîkîyê Îsa çawa merî dikaribû bimira, lê Mesîh awa gotî Kur'ê Xwedê çawa yekî r'uh'anî nikaribû bimira. Ew dersdarêd xalifî t'enê nixumandina Wîye pê avê qebûl dikirin. Yûh'enna vê derê miqabilî wê hînkirinê nivîsiye.

* ^{5:8} Nav destnivîsarêd paşwextîyêda aha jî heye: «Sisê e'zmênda şe'detîyê didin: Bav, Xeber û R'uh'ê Pîroz, ew hersêk yek in. Usa jî sisê ser e'rdê şe'detîyê didin: R'uh', av û xûn». Lê nava destnivîsarêd kevinda ev yek t'une.

* ^{5:11} Yûh'enna 1:4; 3:36.

mirinê*, bira bona wî dua bike û Xwedê wê jîyînê bide wî. Ez vê yekê hindava wanda dibêjim, k'îjanêd ku gunê berbi mirinê nakin. Gune heye ku dibe berbi mirinê. Ez nabêjim, ku bona vê yekê dua bikin. ¹⁷ H'emû neheqî gune ye, lê gune heye ku nabe berbi mirinê.

¹⁸ Em zanin her zar'eke Xwedê nav gunada namîne, lê Nixurîyê Xwedê wî xwey dike û yê Xirab

nêzîkî wî nabe. ¹⁹ Em zanin ku em ji Xwedê ne û t'emamîya dinyayê bin h'ukumê yê Xirab-da ye. ²⁰ Lê em usa jî zanin ku Kur'ê Xwedê hat û fe'm da me, wekî em Yê R'ast nas bikin. Belê em nava Yê R'astda ne, çimkî em nava Kur'ê Wî Îsa Mesîhda ne. Ev e Xwedêyê r'ast û jîyîna h'eta-h'etayê.

²¹ Zar'okno, xwe ji p'ûtp'aristîyê^f xwey kin.

* 5:16 Aha jî tê fe'mkirinê: «Gunekî ku nakuje kirîye».